

Jon 1

Ieta pakanama ya girumina

Yawasana riunama

¹ Boni pakane yaba ya kenakenana inam yawasana riunama. Inam riunama vutuna tauma apasol beamaie kè vaiena, matamaie kè kita da kè kita yaḡe be nimamaie kè taikonina.

² Inam vutuna yawasana, be yawasaninama tauma ḡaromaie ya maḡatara be matamaie kè kitakitana, vutuna yodi kawai matemate be yawasana kenakena nonoḡinama ḡaromie ka rarau guguyena. Inam yawasaninama noḡone Tamadama Mamaitua ḡarone kenakenanama, vutuna yodi ḡarode ya maḡatarana.

³ Be tauma aba matamaie kè kitakita be beamaie kè vaivaiena, vutuna yodi ḡaromie ka rarau guguyena da taumi mate sibo tèi rawateḡeidana Tamadama be Natunama Yesu Keriso ḡarodie.

⁴ Uma kaudima ka girugirumidina ḡaromie da matabuda tà nuavere tenaḡana aubainama.

Yanae tà naḡona

⁵ Be tauma Mamaitua ḡarone vari kè paḡo be ḡaromie ka rarau guguyena inam umanama: Mamaitua tauna yana, be tauna nopone nam kupi ima kenakenana, ibewa.

⁶ Be tauda kupi yawasanidima tà voivoiedina, be yaḡoro tà riuriuna da tauda Mamaitua mate tèi rawateḡeidana, tauda inam banaga kaikaiyovudama, be nam riukaua ruvane tama naḡonaḡona.

⁷ Be deḡoda yanae tà naḡona, maika tauna yanae e miamiana nama, inam raḡanine tauda tokare dà banabanagama mate tàì rawateḡeida be tauna natunama Yesu kosinine dà gewagewama matabudi e koḡa poredina.

⁸ Be deḡoda tà riuna tauda nam gewagewa ḡarode, tauda inam tàwai kedadoka waigewadana, be riukaua nopode nam ima kenakenana.

⁹ Be Mamaitua inam banaga waipatutuna be didimaninama, aubainama tauna tokare dà gewagewama matabudi e noḡota poredi be dà yawasanama barebaredima mate e koḡa poredina, deḡoda dà gewagewama tà kuvesidina.

¹⁰ Baninama Mamaitua ya riuna da banaga matabuda gewagewa banegidama. Be deḡoda tà riuna tauda nam gewagewa te voia rubuna, tauda inam Mamaitua tà riuriu waikaikaiyovuna, be tauna na riuna tauda nopode nam ima kenakenana.

2

¹ Yau sedama,* taugu uma kaudima yà riuriuemina da taumi nam gewagewa ko voiedi. Be deḡoda gewagewa ko voiena, naumeki da banaga tenaḡa tauda dà tausaguma e miamiana. Tauna vutuna tauda muride e midi be aubaidama Tamadama ḡarone e giugiuna. Tauna vutuna Yesu Keriso, didimana baneginama.

² Tauna vutuna ya rauepaiyeda be dà gewagewama aubainama tubuḡine ya tipana aubaidama,

* **2:1:** Riu 'yau sedama' inam nam na seda ḡoma. Be ibewa da tauna banaga poranama aubainama nama e riuriuna.

be nam taudaḡa, ibewa da dobu matabuna adi gewagewama mate aubainama, yodibe Mamaitua nuanama ya subana.

³ Be deḡoda Bada na riuvasasaḡama matabudi tà voteyeteyedina, inam tawai maḡatara mu-naḡedana da tauda inam tauna ḡarogaronama.

⁴ Be deḡoda tam aitau kwa riuna, “Taugu Mamaitua ḡaronama” be na riuvasasaḡama nam kwa voteyeteyedi, tam inam banaga kaikaiy-ovumma be nam riukaua ruvane kuma miamiana.

⁵ Be deḡoda aitau Mamaitua na giuma e vovo teyetyedina, tauna inam Mamaitua na wainu-apaḡoma noponama ya moḡavuna. Be nema tà katai bake da tauda Mamaitua nopone tà miamia?

⁶ Aitau e riuriuna da tauna Bada ḡaronama, naumeki da Yesu nema ya naḡonaḡo bakona, nama tauna e naḡona.

Riuvasasaḡa vaunama

⁷ Yau banaga kauama, Bada Yesu ya riu vavasagaḡedana da tauda dà banagama dà banagama sibo tèi nuapaḡoedina. Be inam riuvasasaḡinama nam riu vauna, ibewa da giunama teneḡinama taumi noḡone koya vaivaiena, vutuna yodi yà girugirumina.

⁸ Inam riuvasasaḡinama inam riu poranama, be you riu vaunama. Be inam riuvasasaḡinama inam riukaua, vutuna Keriso na yawasanae be taumi ami yawasanae ya maḡatarana, bani-nama tadiwanawana ya vaikoakoa be riukaua yanana yodi nopomie e yanayanana.

⁹ Aitau e riuriuna da tauna yanae e miamiana, be degōda turanama ġesau e gadogadoġaiena, tauna inam tadiwanawana noponaġa e naġonaġona.

¹⁰ Be aitau turanama ġesau ewai nuapaġoena, tauna inam yanae e naġonaġona. Be inam baneginama ġarone nam aba gewagewanama ima kenakenana da tokare turanama ġesau ei beku.

¹¹ Be aitau turanama ġesau e gadogadoġaiena, tauna inam tadiwanawana noponaġa e naġonaġo be e miamiana, baninama tauna matanama tadiwanawana ya suma tom be deġo e naġonaġona nam i kataiena.

¹² Yau sedama, taugu uma kaidima yà girugirumidina ġaromie, be ko kataie da Mamaitua ami gewagewama ya noġota poredina, baninama Keriso tauda aubaidama ya mariyawa be ya gurina.

¹³ Taumi dosi tautauġomimima, taugu uma kaidima yà girugirumidina ġaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeġimima, taugu uma kaidima yà girugirumidina ġaromie, baninama taumi Seitan koya vaisubana. Be taumi seda matabumi, taugu uma kaidima yà girugirumidina ġaromie, baninama taumi kaite Tamadama Mamaitua koya kataiena.

¹⁴ Be mate dosi tautauġomimima, taugu uma kaidima yà girugirumidina ġaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeġimima, taugu

uma kaudidima yà girugirumidina ġaromie, baninama taumi koyai rewapanana, be Mamaitua riunama nopomie e kenakenana na rewapanae taumi Seitan koya vaisubana.

Uma dobunama nam koi nuapaġoe

¹⁵ Uma dobunama be yaba matabudi nopone ta kenakenana nam koi nuapaġoedi. Be deġoda aitau uma dobunama ewai nuapaġoena, tauna inam Tamadama Mamaitua wainuapaġoenama nopone nam ima kenakenana.

¹⁶ Baninama yaba matabuna uma dobune tà kitedi be nuadama ta sorusorudina kitedima maika tubuġidama adi ġoanama, bo mata na ġoanama, bo banaga adi waiguyauma. Inam yabedima matabudi nam Tamadama marae ġarone be ti yovona, ibewa da taudi matabudi dobu ġaronama.

¹⁷ Uma dobunama be na ġoanama matabudi tokare ta samoana, be aitau Mamaitua na ġoanama e voivoiena, inam baneginama tokare e mia nonoġana.

Keriso tauwai ġavienama

¹⁸ Yau sedama, yodi inam raġan damodie ta tavatavana. Be boni taumi koya vaie da Keriso tauwai ġavienama e veraverauna e tavana. Be Keriso tauwai ġavienama ġesaudima toitoi kaiteka ta tavatavana. Inam kaudidima tauda tawai kataidana da kaiteka raġan damonama e tavatavana.

¹⁹ Inam banegidima noġone tauda mate tēwai taparoro tenaġana, be yodi a gosedana. Inam banegidima nam tauda dà banaga kaua, be

deḡoda taudi sibo tauda dà banagama, taudi tokare nam a gosedā. Tauda noḡone taudi mate tè miamiana, be taudi a gosedana aubainama yodi tè kataie da inam banegidima taudi nam tauwai sumaḡa damnama nopone tima miamiana. Be deḡoda ti ḡoena, tokare nam a gosedā.

²⁰ Be taumi inam ibewa, baninama Banaga Babaunama kaite matabumi yai aiainimi, be riukaua koya kataiena.

²¹ Taugu ḡaromie yà girugirumana, nam ko noḡoti da taumi kabe riukaua nam ko katakataie, ibewa da taumi riukaua koya kataiena aubainama ḡaromie yà girugirumana. Be inam riukauinama nopone nam tokare kaiyovu tà banavi, ibewa.

²² Be yodi aitau kaikaiyovuna? Banaga aitau e riuriuna da Yesu tauna nam Tauwai yawasana, inam baneginama tauna vutuna banaga kaikaiyovunama, tauna vutuna Keriso tauwai ḡavienama, baninama tauna Tamadama be Natunama Yesu tauboviedima.

²³ Deḡoda aitau Mamaitua Natunama e bovi-boviena, tauna nam tokare Tamanama e paḡo be mate ta mia tenaḡa. Be aitau Mamaitua Natunama ewai anine be e riuriuna da Yesu tauna Tauwai yawasana, inam baneginama tauna tokare Tamadama Mamaitua e paḡo be mate ta mia tenaḡana.

²⁴ Ko kita kaua da aba noḡone ai kataimi be koya vaivaiena, naumeki da nopomie e kena nonoḡana. Deḡoda nopomie e kenana, taumi tokare natunama Yesu be Tamanama Mamaitua mate ko mia tenaḡana

²⁵ be yawasana kenakena nonoḡinama ko paḡona, inam vutuna tauna ya saugedana.

²⁶ Taugu uma yabedima yà girugirumidina ḡaromie da yà riu wainoḡotimina, baninama banaga ḡesaudima ta ḡoeḡoena da taumi tai doka waigewemina.

²⁷ Be taumi Arua Babau kaite koya paḡo be nopomie e miamiana. Vutuna aubainama yodi nam tauwai katakatai ḡesau koma ḡoeḡoena da sibo yai katakataimi. Baninama Arua Babau yaba matabudi ewai katakataimina, be aba tauna ewai katakataimina inam matabudi riukaua, be nam kaiyovu. Be Arua Babau aba yawai katakataimina, nama ruvane sibo raḡan matabuna Keriso ḡarone koya miana.

²⁸ Vutuna aubainama yau sedama, ko kaigurate da Yesu na yawasanae ko mia nonoḡana. Be tauna e maḡatarana raḡanine, tauda tokare ma raudebatorada tauna noḡone tà midina, be nam tà tunimayaḡa.

²⁹ Taumi koya kataiena da tauna didimana baneginama, be mate aitauga didimana ta voivoiedina, inam tauna na sedama.

3

Mamaitua na sedama

¹ Yodi ko kita da Mamaitua na wainuapaḡoma ya moraba kauana ḡarode, vutuna aubainama ya voieda da yodi na sedama tè tubuḡana. Riukaua da na seda ḡomama tauda! Be aba aubainama dobu banegidima tauda nam ti kataieda, inam baninama taudi Mamaitua nam ti kataiena.

² Yau banaga kauama, tauda yodi Mamaitua na sedama tà miamiana, be nema tokare tà tubuḡa bakona, yodi tauda nam te katai kauena. Be aba tè kataiena inam Bada e maḡatarana raḡanine tauda tokare tauna maika tà tubuḡana, bani-nama inam raḡanine tauna tokare bani ḡominama matade tà kitana.

³ Be aitau da Kerisoe inam noḡotinama ḡarone e kenakenana, tauna yawasana miremiredima nam ima voivoiedina, baninama Keriso mate tauna nam yawasana miremiredima i voiedina.

⁴ Aitauḡa gewagewa ta voivoiedina, taudi tarawatu tawai mia kotova kauena. Baninama gewagewa inam tarawatu tauvagudagudanama.

⁵ Be taumi koya kataiena da Yesu ya maḡatarana gewagewa noḡota porenama aubainama. Be tauna nopone nam gewagewa ima kenakenana.

⁶ Be aitau tauna ḡarone e miamiana, tauna nam gewagewa ima voivoiedina. Be aitauḡa gewagewa tawai borudidina, taudi Yesu nam ti kitana, bo nam ti kataiena.

⁷ Yau sedama, ko kita kua da nam aitau e boru waideḡemi. Aitau da didimana e voivoiena, naumeki da tauna banaga didimaninama, Yesu didimaninama e miamiana maika.

⁸ Be aitau gewagewa e voivoiena, tauna inam Diaboro ḡaronama, baninama Diaboro tauna boni pakane nama gewagewa ya voivoiena. Inam vutuna aubainama Mamaitua Natunama ya yovo be ya maḡatarana da Diaboro na noyama e kawa gewegewedina.

⁹ Aitau Mamaitua ḡarone ya tubuḡa vitarana, tauna tokare nam gewagewa ei borudidi be

kwa kita. Baninama tauna nopone Mamaitua yawasana ya boruna maika pesi. Tauna nam teneteneġina da gewagewa e voiedi, baninama tauna Mamaitua ġarone kaite ya tubuġa vitarana.

¹⁰ Tokare nema tà katai bake da deġo taudi Mamaitua na seda, be deġo taudi Diaboro na seda? Umanama tokare tà kataiena: Aitau da nam turanama imawai nuapaġoena, be nam yawasana didimanidima ima voivoiedina, tauna inam nam Mamaitua Natuna.

Turamma turamma nuamma e paġo

¹¹ Uma varinama vutuna noġone tè vaivaiena yodi yà riuemina, tauda sibo turadama turadama nuadama ya paġona.

¹² Be nam sibo Kein na yawasanama tè paġo. Tauna Diaboro ġaronama be tasinama yai gurina. Be aba sabine tasinama yai guri? Baninama Kein inam voia gewegewedima ya voivoiedina, be tasinama tauna voia didimanidima ya voivoiedina, aubainama tasinama yai gurina.

¹³ Yau banaga kauama, deġoda dobu banegidima ta tuaġaiemina, nam ko nuababaġa.

¹⁴ Tauda turadama turadama nuadama e paġopaġona, be inam kedane tauda tè kataiena da guri inam muride tè gose pore be yodi yawasana tè paġona. Be aitau da nam imawai nuapaġona, tauna inam gurinama e miamiana.

¹⁵ Be aitau da turanama e tuatuaġaiena, tauna inam tauvunuġa e miamiana. Be taumi koya kataiena da tauvunuvunuġa nopone yawasana kenakena nonoġinama nam ima kenakena rubuna.

¹⁶ Tauda yodi tokare Kerisoe wainuapaḡo tà kita be tà kataiena, baninama Yesu tauda aubaidama ya mariyawa be ya gurina. Be tauda mate sibo dà yawasanama muride tè boru be dà banagama sibo tè sagudina, deḡoda guri tè banavi bo ibewa, inam matabuna naumeki.

¹⁷ Deḡoda aitaḡo ḡarone taragai be turanama ḡesau ya kita da taragai e marumarubiena, be tauna nam i raunuatoie be i saguna, be tauna e riuriuna da Mamaitua ewai nuapaḡoena, inam nemanama?

¹⁸ Yau sedama, nam mududaḡa wainuapaḡo e riuriue, ibewa da voienama mate. Inam vutuna wainuapaḡo riuriukauinama.

¹⁹ Inam kedane tè kataie da tauda riukaua ḡaroḡaronama, be tokare Mamaitua noḡone nuadama torane tà midina,

²⁰ avedi da nopode tà noḡota bekubekuna, be inam nam tà noḡoti. Mamaitua yaba matabudi ya kataiedina, vutuna aubainama tauna inam noḡota bekubekudima nam ima siesievidina, be tauna wainuapaḡo banidima tà voiedina, vutuna e siesievidina.

²¹ Yau banaga kauama, nopodama nam e vobekubeku, be nuadama torane Mamaitua noḡone tà midina,

²² be ḡarone aba tàì baḡena, tauna tokare e utedana, baninama tauda na riuvavasagaḡa tà vovo teyetyedi be yaba matabuna tà voivoiedina, inam raḡanine tauna nuanama tà taiverena.

²³ Be Mamaitua na riuvavasagaḡa inam umanama: Tauna Natunama Yesu Keriso tàì sumaḡe, be turadama turadama nuadama e paḡona tauna ya riuriu vavasagaḡana nama.

24 Taudi aitaugā na riuvavasagāma ta vovo teyetejena, taudi vutudi Keriso nopone ta miamiana, be Keriso taudi nopodie e miamiana. Tauna Aruinama ya utedana, aubainama tè katai kauena da Keriso tauda nopode e miamiana.

4

Arua ko kita kauedina

¹ Yau banaga kauama, banaga ġesaudima ta riuriuna da taudi arua a paġo be ta giugiuna, inam banegidima nam koi sumaġedi, ibewa da noġone ko kita kauedina, deġoda taudi arua Mamaitua ġarone a paġo bo ibewa. Baninama peroveta kaikaiyovudima toitoi dobue ta naġonaġo bababarana.

² Be aitau da Mamaitua Aruinama ġarone, tauna tokare umanama ko kita be ko kataiena: Tauna aitau e riuriuna da Yesu Keriso tauna Mamaitua ġarone be ya yovo da yai rawabanaga ġomana, inam baneginama tauna Mamaitua Aruinama ġarone.

³ Be aitau deġoda Yesu nam ei maġatari, inam baneginama tauna arua nam Mamaitua ġarone i paġona, ibewa, tauna inam Keriso tauwai ġavienama aruinama ya paġona. Noġone koya vaiena da Keriso tauwai ġavienama tokare e veraverauna e tavana. Tauna vutuna yodi dobue e naġonaġo bababarana.

⁴ Be yau sedama, taumi Mamaitua ġaroġaronama, aubainama uma banegidima koya vaisubedina, baninama Arua nopomie e miamiana, tauna yai rewapana kauana, nam arua dobue e miamiana maika.

⁵ Taudi inam dobu ḡaroḡaronama aubainama, dobuḡa kauidima ta giuedi be ta naḡonaḡona. Be dobu banegidima inam perovetedima kaikaiy-ovudima ta vaiedi be tawai muriwatanedina.

⁶ Be tauda inam Mamaitua ḡaroḡaronama, be aitaḡa Mamaitua na seda ḡomama, taudi dà giuma ta vaiedi be tawai muriwatanedina. Be aitaḡa Mamaitua nam na seda, taudi dà giuma nam tima vaiedi be tima voivoiedina. Inam kauidie tauda tokare tà katai kaue da deḡo tauna arua riuriukauina, be deḡo tauna arua kaikaiyovuna.

Mamaitua tauna vutuna wainuapaḡo

⁷ Yau banaga kauama, tauda turadama turadama nuadama e paḡona, baninama wainuapaḡo inam Mamaitua ḡarone be ya yovona. Be aitaḡa tawai nuapaḡona, taudi inam Mamaitua ḡarone a tubuḡa vitara be Mamaitua a katai kauena.

⁸ Mamaitua tauna wainuapaḡo. Vutuna aubainama aitau da nam imawai nuapaḡona, tauna inam Mamaitua nam i kataiena.

⁹ Mamaitua na wainuapaḡoma ḡarode umanama yai maḡatarina, tauna nuananama natunama tenaḡa ḡominama ya riupore yovoḡena doḡue, da yodi taune tauda yawasana ḡarone tà paḡo be tà miana.

¹⁰ Be Mamaitua na wainuapaḡoma inam umanama: Nam tauda tei nuapaḡo dokena, ibewa da tauna tauda yai nuapaḡo dokeda be natunama ya riupore da aubaidama ya rauelpaiyada be tubuḡine ya tipedana dà gewagewa sabine, yodibe Mamaitua nuanama ya subana.

11 Yau banaga kauama, Mamaitua kaite yai nuapaḡoedana, aubainama tauda mate dà banabanagama sibo tèi nuapaḡoedina.

12 Nam aitau deḡo mata ḡomine Mamaitua i kita rubuna, be deḡoda tauda turadama turadama nuadama e paḡona, tauda inam Mamaitua nopode e miamiana. Be tauna na wainuapaḡoma nopode ya moḡavuna, be yodi inam wainuapaḡonama parata boruborune ya tavana.

13 Tauna aruinama tauda ya utedana. Vutuna aubainama tè kataie da Mamaitua tauda nopode e miamiana, be tauda tauna nopone tà miamiana.

14 Tamadama Mamaitua Natunama ya riupore yovoḡena dobue da tauna dobu matabuna tauwai yawasaninama. Be tauna vutuna tauma kè kita be kawai matamatana.

15 Deḡoda banaga aitau e riuriuna da Yesu tauna riukaua Mamaitua Natunama, inam baneginama nopone Mamaitua e miamiana, be tauna Mamaitua nopone.

16 Be tauda tè kataie be tàwai sumaḡena da Mamaitua ewai nuapaḡoedana.

Mamaitua tauna vutuna wainuapaḡo, be aitau wainuapaḡoe e miamiana, inam baneginama tauna Mamaitua nopone e miamiana, be Mamaitua inam baneginama nopone.

17 Inam kedane wainuapaḡo nopode e moraba be parata boruborune e tavana, inam raḡanine tauda tokare etara raḡanine nuadama torane tà midina be nam tà naira, baninama uma dobue tauda dà yawasanama Keriso na yawasanama maika.

¹⁸ Be wainuapaḡo banegidima taudi nam ma nairidi tima miamiana. Baninama raḡanine wainuapaḡo e moraba be parata boruborune e tavana, naira tokare e tauriena, be aitu ma nairina e miamiana, inam baninama tauna kovoga e nainairena. Vutuna aubainama deḡoda naira nama tà kitana, inam wainuapaḡonama nam i moraba be parata boruborune i tavana, ibewa.

¹⁹ Tauda tàwai nuapaḡona, baninama Mamaitua noḡone yai nuapaḡo dokedana aubainama.

²⁰ Deḡoda aitu e riuriuna, “Taugu Mamaitua yàwai nuapaḡoena.” Be nuanama nopone turanama e gadogadoḡaiena, tauna inam banaga kaikaiyovunama. Uma kwa noḡoti: Turamma matame kwa kitakitana be nam kumawai nuapaḡoena, nema tokare Mamaitua kwai nuapaḡo bake? Baninama Mamaitua tam nam ku kita rubuna.

²¹ Be tauna umanama ya riu vavasagedana: Aitu da Mamaitua ewai nuapaḡoena, naumeki da dobue turanama mate ei nuapaḡoena.

5

Waisumaḡe dobu yawasanidima tà vaisubedina

¹ Aitauḡa tawai sumaḡana da Yesu tauna Tauwai yawasana, taudi inam Mamaitua natunatunama. Be aitauḡa Tamadama tawai nuapaḡoena, naumeki da natunama mate tà nuapaḡoena.

² Deḡoda tauda Mamaitua tà nuapaḡoe be nariuma tà voteyeteyedina, inam raḡanine tokare

banaga ta kita be ta kataie da tauda Mamaitua na sedama mate tàwai nuapaḡoedina.

³ Mamaitua wainuapaḡoenama inam umanama: Tauna na riuvavasagaḡama tà vovo teyetedina. Be inam riuvavasagaḡidima ḡarode nam ti piripirina,

⁴ baninama aitauga Mamaitua ḡarone a tubuga vitarana, taudi inam dobu yawasanidima a vaisubedina, baninama adi waisumaḡama debane.

⁵ Aitau tokare dobu yawasanidima e vaisubedi? Tauna aitau ewai sumaḡana da Yesu tauna Mamaitua Natuḡominama, tauna tokare dobu yawasanidima e vaisubedina.

⁶ Yesu Tauwai yawasana tauna ya yovona tauda ḡarode. Be Arua Babau ḡarode yai maḡatarana da Yesu tauna riukaua Mamaitua Natuḡominama, baninama tauna upae ya babataito be korosie kosininama ya darorona. Be yodi nam upa taunaḡa tà noḡoti, ibewa da kosina mate tà kita be tà kataie da Yesu tauna riukaua da Mamaitua Natuḡominama ya gurina. Be inam kaudima Arua ewai maḡataridina tauda ḡarode. Be Arua aba ewai matematena, nam aitau e riuwai kaikaiyovu, baninama Arua tauna naumeki da riukaua.

⁷⁻⁸ Yodi tà kita da uma yabedima rabuiteḡa; inam Arua, upa be kosina tawai matamatana da inam riukaua. Be taudi rabuiteḡa ai anina tenaḡa da inam riukaua.

⁹ Be banaga ḡoma adi kauama ta giugiuedina tauda tàwai aninedina, be you, Mamaitua aba ḡarode ya giugiuedina inam a moraba guratana.

Vutuna aubainama Mamaitua natunama varinama yawai matematena sibo tè paḡo be tèi sumaḡena.

¹⁰ Aitauḡa Mamaitua Natunama tawai sumaḡena, taudi nopodie Mamaitua riunama e kenakenana. Be aitauḡa nam timawai sumaḡena, taudi Mamaitua ta riuriu waikaikaiyovuna, baninama tauna Natunama varinama yawai matematena taudi nam ti paḡo be ti sumaḡena.

¹¹ Be aba Mamaitua e giugiuena inam umanama: Tauna yawasana kenakena nonoḡinama ya utedana. Be inam yawasaninama tokare natunama Yesu ḡarone tà banavina.

¹² Aitau Mamaitua Natunama Yesu ya paḡo be ḡarone e miamiana, tauna inam yawasana ya banavina. Be aitau Mamaitua Natunama nam i paḡona, tauna yawasana nam i paḡona.

Jon na giuma damodamodima ya sivudina

¹³ Taumi aitauḡa Mamaitua Natunama isanama kowai sumaḡena, ḡaromie uma letanama yà girugirumina da sibo koya kataie da taumi kaite yawasana kenakena nonoḡinama koya paḡona.

¹⁴ Be deḡoda tauda na noḡotama ruvane tà baḡana, tauda tè katai kauena da tauna tokare bonadama e paḡona.

¹⁵ Be tauna bonadama e paḡopaḡona, naumeki da aba ḡarone tèwai baḡena inam kaite tè paḡona.

¹⁶ Deḡoda ai turamma kuya kita be gewagewa e voivoiena, be nuanama e vitarena, naumeki inam gewagewanama nam guri kedanama ima watawatanina, naumeki da tauna aubainama kwa moiragai be Mamaitua ei yawasanina. Be deḡoda ai turamma gewagewama e voivoiena be

nuanama nam e vitare, inam gewagewanama guri kedanama e watawatanina, inam tauna aubainama nam kwa moiragi.

¹⁷ Be yawasana barebaredima matabudi ised-ima inam gewagewa, be gewagewa ḡesaudima damodie guri nam tima kenakenana.

¹⁸ Tauda tè kataiena da aitau Mamaitua ḡarone ya tubuḡa vitarana, tauna nam gewagewa ima voivoiedina. Mamaitua inam baneginama e raberabe kauena, be Diaboro tokare nam tauna e taukoni yababe.

¹⁹ Tauda tè kataiena da tauda riukaua Mamaitua na sedama, be dobu banegidima taudi inam Diaboro na waibadae ta miamiana.

²⁰ Be mate tè kataiena da Mamaitua Natunama ya yovo be yai katakataidana da tauna aitau riuriukauinama vutuna tà kataiena. Be tauna vutuna riuriukauinama nopone tà miamiana. Be mate tauna Natunama riuriukauinama nopone tà miamiana, inam tauna Yesu Keriso, tauna vutuna Mamaitua riuriukauinama, be yawasana kenakena nonoḡinama.

²¹ Yau sedama, kokoitau nam ko raudunedi, avedi!

Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023
9b8bda32-db42-5be3-9d24-4e4a5d5f65b2